

B. N. C
FIRENZE
1069
22

1069. 22





LA #1
IVSTICE
AVX PIEDS DES
PARLEMENS
DE FRANCE.

Par M^r. C. JOVRDAN Huissier
des Comptes Paris.



A PARIS,
Chez JEAN BRUNET, rue Saint
Germain, aux trois Pigeons. 1614.

Avec Privilège du Roy

2
AVX AMATEURS DE
la Justice.

S.

MESSIEURS,

Puis qu'ainsi est que vous estes tant amateurs de la Justice, à qui doit appartenir ce subject sinon à vous, vous la voyez venir en explorée & par le moyen du reſtabliſſement que ce grand Soleil de Paris luy faiſt elle s'eſleue & s'installe en ſa premiere dignité vous ayderez donc (Messieurs) à la ſecourir au maintien de ſon reſtabliſſement, Et n'eust esté l'aſſurance qu'elle a de vous de n'eſtre m'eſpriſee a ſon ſubject elle n'eust esté ſi temeraire que de ſe faire d'elle meſme mettre en lumiere.

Jourdan.



LA IVSTICE
A V X P I E D S D E S P A R L E M E N S
de France.



E voicy ô Parlemens, lumiere de mes yeux, epitomes & abrezgez de toutes Vertus, ie viens me soubmettre à vos pieds, éplorez du tort que l'on me fait, ie viens non avec la Balance qui m'est dōnee en main pour peser au poids de l'equite le droit de la vefue & de l'orphelin, ie viēs nō avec l'espee qui m'est attribuee pour vanger ceux qui empescherōt l'executiō de vos arrestz & apaiser les plus grāds de la Monarchie, & ie viens non les yeux bādez: mais bien sans balance, sans poids, & les yeux clairs-voyans vous faire paroître mes pleurs & mes larmes & le peu de soing que l'on a à ma dignité. Si ie voulois m'exalter & faire paroître l'excellence de ma diuinité qui n'est moins cogneue entre les Monarques qu'entre les vermes & de terre, ie paroistrés à veu d'œil l'organe des vertus; Neantmoins au siecle que ie voy ie suis deprisee & mal seruite, hé! qui cause se m'espris sinon le regne de la corruption, cōcussion, & exaction. Lors que le partage fust fait entre nous les deitez, malheur à moy qui eust le sort & le lot de Iustice (bien qu'il me fust pour lors escheu comme vn phare de toute dignité) puis que ce temps m'abolit, que la corruption opere, que la concussion n'aist, & que l'exaction regne. O quel heur (grands Soleils) si l'vn de ses trois me fust arriué, ie regnerois ores. Ie presiderois, & mon citandart se feroit adorer, cheris & aymer de polle en

polle, ô vous deitez qui dominez la voute azuree si vous
 ne faisiez non plus d'estat de moy que les habitans de la
 terre, vous iugeriez beaucoup les hommes sans aucune
 misericorde & pitié. Et comme vous m'avez recogneu
 non pas Phœbus en sa lumiere, Iupiter en son tonnerre,
 Mars en ses armes, Mercure en son eloquence, Neptune
 en ses eaux, Pluton en son enfer, Hercules en ses forces,
 mais vne source de toutes choses, vous m'avez installé
 au milieu de vous, afin de regir ce qui est de vos passions
 contre les citadins du monde. Dans le Ciel toute sorte
 de respect m'est deu, les mers & les fleuves m'obeissent
 l'Enfer n'est gouverné que par ma voix és personnes de
 Neptune & Pluton. Et la terre moindre de tout se veut
 rendre maistresse de moy: Puis que le Ciel, la mer, & les
 enfers, me portent hommage, que les trois plus grandes
 deitez commendent à icelles, n'ay-je pas (ô Parlemens)
 iuste subiect de me plaindre, vous estes mes lumieres &
 mes flâbeaux, qui doiuent m'esclairer non dans vos pal-
 lais seulement: Mais dans vos cabinets les plus secrets,
 le Ciel me cherit & m'ayme cōme superieure & les hō-
 mes de la terre veulent m'enseuelir en vn tōbeau d'ou-
 bly, sans moy vn million d'assassinats, violemens, larcins
 & autres s'exerceroient par chacū iour; N'estoit que ma
 prudence & sagesse qui de tēps en tēps s'est fait cognoi-
 stre, s'est efforcee au mieux qu'elle a peu extirper l'ex-
 cutiō de tels actes execrables; nul ne peut me blasmer de
 mes plainctes, s'ils ne sont perturbateurs du repos pu-
 bliqu. O Atheniens Atheniens ie regrette l'abolition de
 vostre Senat, qui a esté & sera iusques en fin du monde
 renommé, cestoit ô Senat d'Athenes le lieu de ma de-
 meure, cestoit mon siege mon palais & mon temple,
 vo' avez aussi ô Atheniens assez recogneu qu'elle estoit
 ma suffisance, puis que tant d'annees par moy ou soubz
 mon nom vous avez gouverné prudemment & sage-

ment vostre republique souueraine, ie vous aymois & cherisois entant que vous estiez lors, ie vous regrette & vous deplore entant que vous n'estes plus, vostre lustre est aboly, mon lustre est abaissé; Ou trouuera-on à present ceux qui presidoient au Senat les yeux creuez pour ne point cognoistre les parens amis & alliez habandonnant par ce moyen toutes sortes de plaisirs & de contentemens que la veüe nous apporte, ou sont les Senateurs ou Conseillers à qui on coupoit les poings, afin qu'ils ne fussent corrompus par or, argent, ou present. l'estois lors en mon periode, on me rendoit esgalle en tout, & qui me derogeoit estoit lapidé, n'est-ce pas avec raison que d'abondant ie me plains de l'abolition de ce Senat. Or puis que la diuersité des temps a entrepris m'aneantir, & bien qu'aucunement i'aye esté serui? Cest à vous flambeaux de ma France que ie viens declarer les subjects de mes plaintes, & les ayant entendus, me restabli au premier estat que i'estois lors de ce Senat d'Athenes, non que l'on obserue les yeux creuez & les poings coupez, mais en ce qui est du droit & de l'equite que l'on doit rendre à vn chacun soubz mon nom. Cest mon dernier refuge que vous autres, i'ay vogué çà & là pour treuuer quelque residence, ie n'ay peu ce faire treuuant les Iusticiers trop corrompus sans ame, sans foy, sans loy, ne sans Dieu, cest à toy principalemēt ô Parlemēt de Paris Tutrice des Roys, conseruatrice du peuple, Ouy? c'est à toy que s'adressēt mes sâglots, reçois moy en mes faits iustificatifs, prēds ma balâce ie te la cedde, prends mon espee ie te la dōne, & oste mon bâdeau & fais me voir le clair de tes arrests. Ie t'ay choisie entre to⁹ les Senats, cest biē te recognoistre capable & suffisante de postposer ma deité à tes pieds, ouy? C'est bien te recognoistre sage, que de te cedder mes armes, & moy qui suis Iustice te venir demander Iustice, c'est t'auoir donné mon pou-

uoir m'en estre despoüillé, & puis le venir emprunter
 de toy, ie suis, & ie ne suis plus : Ie suis entant que sans
 moy les Republiques & les polices ne seroient rien par
 consequent president par tout. Ie ne suis plus entant
 que le throsne d'yuoire de Salomon est aboly. Si ie n'e-
 stois fondee en l'esperance que i'ay d'estre restablie par
 vous. Ie prierois les deitez de me permettre eschanger
 mon lot au plus moindre de ceux de nos partages. Clairs
 astres de la France, estandars de l'Vniuers empruntez de
 moy ce qui est de l'equite, & compassez mon droit à la
 raison, & exaltez-moy selon la qualite qui me doit estre
 attribuee, Ie ne puis estre ignorante, & partant puis que
 vous estes appelez en ce throsne de pourpre & d'escar-
 latte parsemé de fleurs de lys, & que vous y estes de par
 moy, vous ne pouuez rien ignorer entant que vous estes
 mon mesme esprit. Les Nourrissons ont cognoissance de
 leurs nourriciers & s'efforcent les assister en leurs affli-
 ctions. Hé! que ferez vous à l'equipolét, ô Parlemens non
 mes nourrissons, mais mes enfãs, nō mes enfãs, mais mes
 nourriciers. Frâce ie suis ton phar, tu dois esire mō vais-
 seau & moy le gouuernail & pilote. Ie te dois cōduire en
 la mer d'assurance, & neâtmoins les rebelles m'en em-
 peschent la conduite, s'emancipent de le guider &
 puis est prest de faire naufrage. Estant donques reduite
 ainsi qu'un sang innocent espanché sus terre & qui crie
 vengeance aux deitez, ie viens à vos pieds (Parlemens)
 ma lumiere esteinte afin de l'establiir en sa splendeur &
 luy donner nō vn lustre nouveau de ce siecle, mais mon
 lustre ancien. Ie flechis? pourquoy flechir, parce que le
 temps me fait regner en iniustice. Cōment? par le moyen
 des corruptions, concussions, & exactions a present re-
 gnans en tiltre d'honneur, & qui sont indignes de moy:
 Que le Ciel mesme abhore, que la terre & les hommes
 apprehendent, & desquels vengeance en est crieie non

seulémēt à moy mais aux deitez plus releuees que moy.
 Si le cōplot de la perte du monde auoit esté resolu entre
 nous les deitez, i'y aurois tenu le rang primitif & s'il n'e-
 stoit tel il en seroit de peu esloigné, & quand bien ceste
 resolution seroit faite sans moy, on ne la peut faire sans
 s'ayder de moy. Du temps des citoyens de certaine isle
 du polle Antartique submergee depuis par les flots ma-
 rins, me figuroient en leur temple & m'y adoroient, sur
 mon frond estoit peint toutes sortes de diuersitez, en
 ma main dextre au lieu de mon espee vn vermeseau, en
 l'autre fenestre vne fremis, tesmoignant que les mains
 corruptibles & concussionnaires, sont peu voire mesme
 rien du tout, mais sur mon frond ou estoit toutes ses
 diuersitez representoit comme vn sacrifice ou holocau-
 ste que l'on me vouloit faire pour apaiser esgalement &
 avec equité ses diuersitez, tellement que mon esprit &
 iugement sortoit lors par vn Echo rendant vn chacun
 comtant selon les faicts plus meritoires, mais à present
 au lieu de se fremis & vermeseau. On me veut peindre
 avec tonnerres foudroyans & fleuves debordez pour
 ruiner par le feu & submerger par les eaux les citez & les
 hommes sans subiect, sans raison, & sans equité. On me
 peint sur le frond, les rigueurs, subtilitez, or, argent, &
 present, le tort mesprise le droit, & outre se mespris s'en
 veut directement & absolument rendre superieur. Je ne
 puis estre blasmee (ô Senateurs de France) de la plainte
 que ie forme, puis que ie suis ou dois estre primitiue de
 tous: Non de vous seuls (à qui ie refere l'honneur de mon
 honneur) mais aux Monarques, Republiques, & Souuer-
 rains de l'Vniuers entieremēt. A qui doit appartenir les
 palmes & les lauriers, sinon à mon chef qui en doit estre
 enuironné: A qui doit appartenir le son de la renommee,
 sinon au souffle de ma bouche, à mon bras dextre la va-
 leur & les forces, en l'autre l'equité du poids & de la ba-

lance. Bref ie suis la corne d'abondance feinte par les
 Poëtes & partant seul Phœnix tant au Ciel qu'en terre,
 Si l'autorité des Dieux supremes vouloient pour leur
 regard & proufit particulier, prononcer quelque iniuste
 arrest (Bien qu'ils ne le peuuent faire, estans parfaits en
 tout.) Ils n'en pouroient estre repris entant que nulle
 autre puissance n'est au pardessus d'eux. Mais il n'est pas
 ainsi des arrests des hommes, tributaires de la mort, &
 qui doivent rendre compte aux diuinitez de leurs senten-
 ce, iugemens, & arrests. Vous n'en ignorez & ne pouuez
 en ignorer, ô Parlemens, ny mesme ce qui est de l'efficace
 de mon nom, & de l'estandue de mon pouuoir & qui en
 ignorera m'offensera non par ignorance mais par mali-
 ce, l'ignorant n'est & ne peut estre blasme en son igno-
 rance, & l'innocent en son innocence, mais cil qui scait
 & contrefait & qui ne doit rien ignorer doit estre puny
 selon les loix anciennes. Du temps de l'Empire des Ro-
 mains, l'Eloquence vne de mes filles regnoit tellement
 en la personne de M. T. Cicero, que souuent il empor-
 toit le pris de son dessein, d'autant qu'il (ou peu) n'entre-
 prenoit aucune chose que iuste & raisonnable, le sou-
 stien du droit & de l'equite qui m'environnent & dont
 ce Cicero estoit enfançon l'ont rendu eternise avec ses
 Oraisons plus qu'eloquentes qui seruent de leçons non
 aux nourrissons des Colleges. Mais des plus doctes per-
 sonnages. Sa mort funeste dans le Trium-virat a assez
 tesmoigné la passion d'Anthoine & de Lena qui execu-
 ta la proscription contre Cicero qui auparauant par
 son bien dire l'auoit deffendu en iugement & faict es-
 quiuier vne punition criminelle. N'estoit-ce pas me fou-
 ler aux pieds de rauer ceste source de merite par la seu-
 rité d'Anthoine & par la cruauté d'iceluy Lena. Cest lors
 (ô Trium-virat) que mon pouuoir, ma force, & ma puis-
 sance, commença a decliner, vous entrepristes (ô trois
 Princes

Princes) la plus execrable & abominable proscription qui auoit iamais esté inuentee par Sylla, n'y que ie croys pouuoir estre suiui par cy. apres, tant que le Soleil esclairera dans le Ciel & sur la face de la terre. Et toy Decimus Brutus quel tort me fis tu? Quand derogant à ma puissance tu consentis & feus l'autheur de l'assassinat commis en la personne de Iules Cesar, au milieu du Senat Romain, suiuy des Senateurs qui auparauant m'auoient porté toute sorte de respect à moy deu: Assassiné d'un guet apens & dans vn lieu sacré à moy dedié, celuy qui t'auoit fait par son testament son heritier en second lieu par substitution, apres Octauius Cesar fils de sa sœur. Tu sçais? ô Rome, que toutes les subtilitez, inuentions, & trahisons que l'on a faict enuers I. Cesar, n'a esté qu'au detrimement de l'honneur & de la vie des entrepreneurs, i'aproue la proscription enuers les vrais fauteurs, & ie me plains raisonnablement de ceux qui ont esté proscripts & l'effect de la proscription executée contre gens Innocens, tant pour auoir leur argent (comme Stacius Samniten proscript pour ses richesses) comme pour auoir les belles demeures des notables ainsi que Rufus proscriit à cause d'une belle maison qui estoit pres celle de Fulvia. femme d'Anthoine second Prince du Trium-virat, & beaucoup d'autres hommes & femmes signalees proscripts & condempnez à grandes sommes de deniers pour subuenir aux frais de la guerre, & de ses femmes ainsi prosrites, le nombre fut de quatorze cens, mais l'éloquence d'Hortensia fist moderer ce nombre de quatorze cens, à quatre cens. Ie ne regnois lors, i'estois seruante de la tyrannie, & ses tyrans pourtant ne dispoient que des corps & des biens par iniustice, mais moy ie dispoie de mesmes droits par droit, non: des corps & des biens seulement, mais des ames que le Ciel enuoye par moy es tenebres d'En:

fer comme criminels des saintes deitez, si ie voulois inuentorier & rediger par escrit, les auteurs de la tyrannie de mon nom, les cruautéz & seueritez que la bouche des hommes superieurs ont exercee contre mes loix & contre les hommes dependans d'eux, avec rage & fureur blâmant toute sorte de droit, ce seroit vn volume qui excéderoit en grosseur & admiratiō tous ceux qui ont pris naissance dans les beaux esprits & sortis avec arrogance de l'Imprimerie pour se rendre immortels dans le temple de memoire & le palais de la felicité. Puis donc que par le moyen des tyrans, de la tyrannie, & de l'iniustice que m'ont fait les Romains, Arabes, & Ethiopiens & qui aujourd'huy sont encores obseruees entre plusieurs nations estrangeres qui m'ont bannie hors de leurs temples & des lieux à moy sacrez, que ie n'ay aucune retraite ne demeure en ce bas Vniuers, où fuyray-ie où iray-ie, puis que l'ignorance des hommes ou plustost leurs corruptions, concussions & exactions qui regnent en eux me fait quitter toutes prouinces, & ne pouuant souffrir ces torts & griefs ie suis resoluë d'abandonner le monde & me contenter de la place qui m'est deuë au Ciel, mais quoy ? Toutes Prouinces ne m'ont pas offēcée, & partant faut reſtablir toute ma splendeur en celles qui sont innocentes. Cest toy France iardin de l'Vniuers, courtoise en tes receptions, cest toy que j'auois reservee pour mon donjon preuoyant par le passé, la tempeste du temps arriué. Tu porte telle fleur en ton iardin qui a tel pouuoir qu'elle peut & pourra renuerser mes ennemis par terre à millions, cest ce lys qui t'a esté & t'est donné des celestes, caractéré dans ton Oriflamme fleur qui a esté & est arrosée d'une eauë tiree du plus pur element celeste, cest ceste phiole enuoyée à Crouis ou ceste sainte Ampoule, ceste sainte onction gillt & repose pour oindre les chefs legitimes de

la France. Et d'autant que ie sçay n'estre point refusee ne troublee au repos de celieu par moy choisi, Cest toy France que ie veux honorer & que tu m'honore, emprunte de moy (côme de tout temps tu as fait sans reproche) mes vertus & mes dignitez & tout prosperera comme ja il a fait, & mieux si ie le puis faire. Or ainsi que dans vne citadelle frontiere, il y a plusieurs esperons & boulleuars pour la deffence d'icelle, & au milieu le donjon, au cœur de ce donjon la demeure du Gouverneur. De mesme France, tes villes frontieres sont tes boulleuars, tes sept Parlemens sont tes citadelles, & Paris ton huitiesme Parlement Soleil & primitif de tous cest ton donjon au milieu d'iceluy ie choisiss ma place & ma demeure, me la refuserez-vous (ô Paris) non? vous ne le pouvez faire, vous ayant appris de ieunesse la super-intendance que i'ay en toutes sortes d'affaires, & m'assurant du tout en ce, Ie me releue de vos pieds (ô Parlemens) & moy-mesme ie m'installe au premier lieu de mon liect de Iustice, ie ne parle plus en esplorée, environnée de tristesses, & suiuite de compassions, & puis que ie suis estable & maintenue, par ce Soleil radieux qui esclaire en toutes parts, ie parle avec force, violence, & courage contre les coupables, compassion & mercy pour les Innocens. Quand le bon Soldat voit son Capitaine en chef à la breche, il chasse hors de soy toute couhardise & s'empare d'une force animée & courageuse, & quand la ville assiegée est vaincue & donnée au pillage cela depend de la mercy du chef d'armee. Me voicy? ô ames loyales, ô estoilles celestes, ô rayons du Soleil, source d'equité, me voicy? ô Nobles Senateurs, preste, la demie pique en main à la breche d'une cité remplie de concussinnaires & corruptibles, me voicy? La cité prise pour faire chastier par vos iustes arrests les malfauteurs que nous trouuerons dans icelle, me voicy? Pour reestabli-

par ma force ceux qui ont esté depouilleez de leurs possessions par le sort malin, me voicy restablie de par vous en mon premier lustre & splendeur, & me voicy ? Pour faire par vostre intelligence misericorde aux Innocens accusez. Je vous donne (ô flam beaux de mes yeux) la terreur & la douceur, pour compasser egalle ment selon le merite ou demerite, il n'y a que Dieu seul qui iuge les Iuges au milieu de son esprit ie preside, & bref aduisez (mes illustres Senateurs) que nulle plainte ne se fasse au Ciel de souffrir que ie sois plus abaissée. Je ne puis me p'aindre de vous, puis que mon reestablishement a esté fait de par vous, & au periode de vous, ie n'ay doncques aucune doute que vous ne me mainteniez contre les meschans, car si ie decline vne autre fois l'abandonneray le sejour des hommes & les laisseray comme vn cheual elchappé, ou vn vaisseau sans gouvernail. Par ce que mes boulevards ont esté minez, ma citadelle batuë & prise il ne reste que vostre donjon (ô Paris) dans laquelle ie suis avec le guidon de toute esperance & assurance, d'ailleurs j'ay le Ciel pour protecteur & deffenseur, cest ce qui me fait croire que me faisant luire vous participerez non aux rayons de ma lumiere seulement, mais à ma lumiere mesme, faisant pour moy, vous faites pour vous, & pour le repos du bien public, Qu'elles graces dois-je à présent rendre au Ciel pour les hommes de la terre, d'estre en si peu de temps introduite par les Senateurs de France en mon siege d'yvoire. Arriere Atheniens vous n'estes plus, arriere Senateurs Romains, arriere toutes sortes de Prouinces indignes de moy. Et place place à mes legitimes François, qui m'ont de tout temps receüe mainrenue chérie & aymee paroissant aussi entre eux comme vn colosse Rhodien, car mon espee sert à la nocturnité de phare pour la conduite des vaisseaux esgarez, & de iour mes balances pour faire guider

à port de salut toutes sortes de marchans fatiguez pour
 leur lōg voyage, & au lieu du miroir où glace qui estoit
 au milieu de ce Collosse dans laquelle on pouuoit voir
 le port d'Alexandrie distant de quatre cens lieū. l'ay
 vne glace plus releuē & plus fine qui ne penetre non
 seulement de Roddes en Alexandrie, mais de Paris en
 toutes les quatre parties du monde sans aucun lieu se-
 cret en excepter. Courage batons en ruine tous les per-
 turbateurs Concussionnaires, corruptibles, partisans à
 la foule du peuple, & autres telles nations. Et bastissons
 vn temple de memoire aux gens de bien qui ne desirēt
 que paix & repos m'honorer & respecter, & sçachant
 que vous auez (ô mes Soleils) ia commencé les fonde-
 mens de ce temple, continuez-en vostre beau dessaing
 & moy i'en feray la couerture & decoreray de sculpu-
 re & peinture vous assurant de ma part que ià vos nōs
 sont immortalisez en mon temple celeste, que la fureur
 du temps ne pourra iamais esteindre, ny le rouille d'ice-
 luy effacer, & comme i'ay commencé avec pleurs, lar-
 mes, & gemissemens, qui vous ont du tout en tout es-
 meu, & finis par vne paix & repos general avec ioye &
 allegresse d'auoir esté de la façon sollicitée & soulagee
 en mes afflictions, & remise en mon premier degré, qui
 m'oblige en toutes occurrences vous assister de mon
 bras, de mes forces, & de mon pouuoir, vous prenant
 des à present en ma protection & sauuegarde.



SONNET.

EN un si beau subject ie ne t'airay mes vers
 Puisque dedans Paris est le lieu de Iustice
 Qui en fin bannira le forfait & le vice
 Que l'Enfer a produit par tout c'est Vniuers.

Je connois a present que le peuple est peruers,
 Et que de lequité il n'accepte la lice
 Telles gens ont pour but un enorme supplice
 Qui leur est préparé dans le creux des Enfers.

Il semble que le Ciel d'une face amoureuse
 Veuille rendre Paris du tout en tout heureuse
 Pour seruir de lumiere en toute nations.

Sans doubte puis qu'elle a tant d'honneur & de gloire
 C'est pour la rendre en fin chef d'œuvre de memoire
 Puisque Iustice y est, ainsi que l'a voyons.

A LA VILLE DE PARIS.

Paris tu es sans pair dans ceste boulle ronde
 Tu es flus & refluus ou toute chose abonde
 Beau seiour de nos Roys ou l'on voit allentour
 Les Nymphes de la Cour miracles de l'amour,
 College de tous Arts, & de toute eloquence
 Estandart des Docteurs de parfaite science

15
À scolo de tout point ; Ou en toutes saisons
De la vertu on voit les petits nourrissons
Tu n'est non seulement premiere de la France
En doctrine en sagesse en Iustice en science
Mais de tout l'Vniuers : Ouy certes ie le dis
Qu'au monde il ne peut pas estre un second Paris.

AVX ARMES DE LA DICTE VILLE.

S'il falloit hors Paris, faire guerre naualle
Ie voudrois le vaisseau de ma terre natalle
C'est celuy ô Paris qu'en tes armes tu prend
C'est cil apres le Roy que ta ville deffend
Ainsi la picque en main ou bien la balle en bouche
Contre les ennemis nous ferions escarmouche
O que ie suis heureux, qu'il y a trois cons ans
Que mes predecesseurs estoyent tes citoyens,
Estant donc honoré d'une telle patrie
Ie fais offre comme eux de mon corps de ma vie
Afin de faire voir a la posterité
L'affection que i'ay de ta prosperité.

F I N.

Extrait du Priuilege du Roy.

PAr graces & Priuilege du Roy, Il est permis à Iean Brunet, Imprimeur & Libraire, d'imprimer ou faire imprimer vn liure intitulé: *La Iustice aux pieds des Parlemens de France, composé par M. C. IOVRDAN Huissier des Compres Parisien*: Et deffences sont faictes à tous Imprimeurs Libraires & autres, d'imprimer ou faire imprimer vendre ny distribuer, deuant le temps & espace de trois ans entiers & accomplis, à compter du iour que ledict liure sera acheué d'imprimer, sur peine de cōfiscation des exemplaires qui se trouueront imprimés & d'amende arbitraire, Donné à Paris le 25. de Iuin mil six cens quatorze.

Signé B V Y E R.

2 1069


22

558660









MC

